

Հաշվետու՝ 2020թ.-ին, «ՀԱՅԷԿՈՆՈՄԲԱՆԿ» ԲԲԸ-ն, հավատարիմ մնալով սահմանված ռազմավարական նպատակների արդյունավետ իրագործման ավանդույթին, չնայած համավարակի, Արցախյան պատերազմի ու հետպատերազմական իրավիճակի բացասական ազդեցություններին, արձանագրեց մի շարք նվաճումներ և հիմնական ցուցանիշների զգալի որոշակի աճ, շուկայում դիրքի ամրապնդում՝ շնորհիվ հաճախորդների վստահության, հավատարմության և Բանկի աշխատակիցների նվիրված ջանքերի, արդյունավետ ու ակտիվ թիմային աշխատանքի՝ ապահովելով բանկի շարունակական կայուն զարգացումը և գործունեության որակապես նոր՝ առավել արդիական փուլին անցումը:

Բանկի գործունեության կարևորագույն գնահատականներից է շահույթի ավելի քան 44.2%-ով կամ 1,470.5 մլն. դրամով աճը, որը կազմել է 4,796.5 մլն դրամ:

2020թ., նախորդ տարվա համեմատ, բանկի ակտիվներն աճել են ավելի քան 40.1 մլրդ դրամով կամ 14.3%-ով՝ կազմելով 320.8 մլրդ դրամ, ընդ որում՝ հաճախորդներին տրված վարկերը և փոխատվություններն աճել են 17.2 մլրդ դրամով կամ 9.8%-ով՝ կազմելով 193.3 մլրդ դրամ, ներդրումային արժեթղթերը՝ 18.7 մլրդ դրամով կամ 73.4%-ով՝ կազմելով 44.2 մլրդ դրամ:

Բանկի պարտավորությունները, որոնք ձևավորվել են ներքին և արտաքին շուկաներից ներգրավված ժամկետային միջոցների և ցպահանջ միջոցների հաշվին, հաշվետու տարում աճել են 15.7%-ով կազմելով՝ 279.2 մլրդ. դրամ: Հաճախորդների նկատմամբ պարտավորությունները նվազել են 0.87 մլրդ դրամով կամ 0.8%-ով՝ կազմելով 112.5 մլրդ դրամ: Բանկի կապիտալն աճել է 5.4%-ով՝ կազմելով մոտ 41.6 մլրդ դրամ՝ հիմնականում արտաքին աղբյուրի՝ կանոնադրական կապիտալի համալրման, և ներքին աղբյուրի՝ ձևավորված շահույթի հաշվին, «Իրական արժեքի պահուստ»-ի զգալի՝ մոտ 1.9 մլրդ դրամով նվազման պայմաններում:

Հաշվետու տարում բանկը շարունակեց փոխշահավետ համագործակցությունը միջազգային ֆինանսավարկային կառույցների և արտերկրի խոշորագույն առևտրային բանկերի ու ֆինանսական կազմակերպությունների հետ՝ ընդլայնելով համագործակցության շրջանակները, գործող ծրագրերը, ինչպես նաև ծավալվեց գործակցություն նոր բանկային ծառայությունների ոլորտում: Այսպես, 2020թ. բանկը միջազգային ֆինանսավարկային կառույցների հետ կնքել է 25.0 մլն ԱՄՆ դոլարի, 5.0 մլն Եվրոյի և 10.7 մլն ԱՄՆ դոլարին համարժեք ՀՀ դրամով վարկային պայմանագրեր, որոնցով ներգրավված ռեսուրսներն ուղղվելու են միկրո, փոքր և միջին բիզնեսի վարկավորմանը և զարգացմանը, այդ թվում՝ կին և երիտասարդ հաճախորդներին, «Սոցիալական», «Կանաչ» և գյուղատնտեսական ծրագրերին ուղղված վարկավորմանը:

Հաշվետու տարվա բանկի արդյունավետ տարածքային քաղաքականության մասին են վկայում նախորդ տարիներին գործարկված մասնաճյուղերի կայուն և դինամիկ զարգացումը, ինչպես նաև տարվա ընթացքում գործարկված մասնաճյուղերի գործունեությունը:

Բանկի զարգացման արձանագրված հաջողությունները մեծապես պայմանավորված են արդյունավետ կադրային քաղաքականությամբ, որը զուգակցում է կադրերի վերապատրաստումը գործուն խրախուսման համակարգի ներդրման հետ:

Բանկային համակարգում սուր մրցակցությունը նպաստում է համակարգի ընդհանուր առաջընթացին՝ պայմանավորված մրցակցությանը դիմանալու նպատակով բանկերի կողմից

ձեռնարկվող միջոցառումներով: ՀՀ բանկային շուկայում դիրքերը պահպանելու և առաջընթաց զարգացում ապահովելու նպատակով՝ բանկը.

- մեծ ուշադրություն է դարձնում մատուցվող ծառայությունների ոչ միայն քանակական բազմազանմանը՝ նոր վարկային և ավանդային ծառայությունների մշակման և ներդրման առումով, այլ նաև որակի բարձրացմանը, հաճախորդների սպասարկման ոլորտում նորագույն արդիական թվային տեխնոլոգիաների կիրառմանը, ինչին և նպատակաուղղվում է կապիտալ ներդրումների որոշակի մասը,
- իրականացնում է ակտիվ գովազդային քաղաքականություն բանկի կողմից մատուցվող նոր ծառայությունների և նոր սակագների մասին հասարակության լայն շերտերին իրազեկելու համար,
- արձագանքելով ներքին շուկայում տեղի ունեցող զարգացումներին՝ բանկը վարում է ճկուն սակագնային և տոկոսադրույքային քաղաքականություն:

Ռիսկերի բացահայտման և կառավարման գործուն համակարգի կատարելագործմանն ուղղված միջոցառումները մշտապես գտնվում են բանկի ղեկավարության ուշադրության կենտրոնում: Բանկի ռիսկերի կառավարման գոյություն ունեցող համակարգը, որը ներառում է ««ՀԱՅԷԿՈՆՈՄԲԱՆԿ» ԲԲԸ ռիսկերի կառավարման» քաղաքականությունը՝ ըստ տարբեր ռիսկատեսակների կից կարգերով մշտապես զարգանում ու կատարելագործվում է, որը առաջիկայում նույնպես կզարգանա, կկատարելագործվի և կունենա նոր որակական մակարդակներ:

Խորհրդի նախագահի տեղակալ

Խորհրդի անդամ

Ռ. Հայրապետյան

Հ. Սուվարյան

30.04.2021թ